

香葉草堂詩存

序

壬辰之春予自粵北歸始晤羅子兩峯於  
錢蕸石之木雞軒眸子炯炯有曠古之懷  
手冬心前後集迢然作鸞嘯聲蕸石笑曰  
如見冬心復生矣蓋冬心之高弟子腹貯  
皆金石琳琅深情遠韻不僅師冬心畫梅  
者也旣而南返又一再北上其於畫理深  
入古作者之室幽深夔邈之趣悉寓之於  
詩蓋冬心之詩以含蓄見味而兩峯能盡

發其所欲言者然予嘗論古淡之作必於  
事境寄之放翁亦言絕塵邁往之氣於舟  
車道塗間得之爲多兩峯自南北數千里  
間選勝懷知登臨節物之感離合棖觸之  
思蕭寥沉頓每以空音淡佇若不欲暢發  
之至盡者此卽冬心詩畫髓也予與兩峯  
論文譚藝往復相質倏復二十餘年相對  
皆白髮矣語曰心之精微口不能言也故  
爲衰次其前後諸集約存二百餘篇以志

吾二人質言不欺之素而屬思飛騰仍以  
冬心爲歸宿焉此後讀兩峯詩詣之益深  
則迴向舉似皆鏡象離詮之旨矣更何從  
而拈說也哉

乾隆六十年歲在乙卯秋九月朔北平翁  
方綱

香葉草堂詩序

往時讀金冬心先生集愛其造懷夙遠蓄  
韻幽微如清夜九霄落魚山之梵如深雪  
萬嶂品雷威之琴濯紅泉而散蕤煉白石  
而飛翠白標高格莫躡後塵而兩峯獨能  
因瓶鉢之傳研花水之味指歸龍象歎咏  
鸞凰闖乎師門鼓其靈柩所刊香葉草堂  
詩一卷天樂自奏六塵盡空水波不興萬  
里一碧句可呈佛心時雜仙娓娓乎其趣

長泠泠然其旨遠已然而頻年作客半世  
憂貧徒以繪事之精用博名流之翫活梅  
花於腕下生竹樹於胷中春山淡而秋山  
明新鬼大而故鬼小兩峯善畫鬼趣圖傳於時極雲  
烟之變幻恣粉墨之臨摹遂令蔗汁稱珍  
榴皮見重伺恕先以美醞購營邱以兼金  
莫不知野王無聲之詩而罕能知摩詰有  
聲之畫也嗟乎風塵落落珍髭誰誇雪刺  
蕭蕭勞薪易感異地之賞音已少故山之

招隱方殷鳥倦須還鱸香可慕我去負東  
郊之米君歸卜西郭之居他日柔艣一枝  
枯筇三尺能尋夙約來話舊遊相與遵聖  
湖之濱訪冬心之墓爲披宿草重炷瓣香  
殘碣幾行讀來夕照新詩一卷唱向秋墳  
不又足以證三生之契也乎

嘉慶元年歲在丙辰秋八月錢塘愚弟吳  
錫麒拜撰

香葉草堂詩存

揚州羅聘遜夫氏著

揚州市人歌爲朱二亭作

君不見益州路口朱桃椎日織芒屨無人  
知又不見會稽山中朱百年伐藥采若日  
換錢愛隱由來不羈士或隱山林或朝市  
我亦開門城市中安得超然竟如此朱二  
亭著簪韋帶無俗撓絕似趙岐讀書非沾  
名何嘗避人擇幽谷列肆通闌接鄰曲籓



桐叟賣漿翁執業談經相往復詩好曾聞  
團扇題酒香宜傍糟牀宿月明橋頭月色  
新看君白眼傲通津平生絕少輪蹄想何  
必披裘釣富春

過枝上邨

門外聞磬聲入門磬聲歇共坐話無生寒  
林待明月開閣矚遠郊行人烟際沒

金陵懷古

龍蟠虎踞蔚雲霞西望臺城噪晚鷗黃葉

素秋初地樹輕烟淡粉六朝花清溪流  
悲江令舊巷居人指謝家幾度秦淮灰  
剗後獨開冷眼看繁華

與楊漑夫野飲歸

愛我若愛酒酒痕污我衣隔溪相揖別穿  
樹獨吟歸月出秋無滓山眠雲不飛此時  
人寂寂一鶴守柴扉

題宮怡雲宗伯七柏圖

孤松處士詩千首五柳先生酒一杯何似

圖中七株柏東封山上翠飛來

西山道中

蘿逕綠無次百蟲聲裏行不知田父姓轉  
問野花名茅屋隔溪見柴門架樹成東臯  
原有約何日果躬畊

爲吳朗陵畫水仙

地殊南國故開遲宮額塗黃口拭脂悄坐  
薄冰殘雪夜家鄉想着水仙祠

冬心先生畫佛歌

冬心先生真吾師渴筆八分書絕奇當年  
寫經鑊棗梨百千萬卷功德施近來畫法  
得妙諦畫馬何曾墮惡趣轉而畫佛求福  
禪自稱如來最小弟三熏三沐圖一軀佛  
幌輕烟散香氣清淨眼耳清淨身端坐獨  
結清淨因無價寶樹綿冬春青蓮花大如  
車輪但恐畫畢十指一時合縷縷不斷生  
白雲又恐毒龍攫飛揚什襲護持深忌戲  
此畫果然得未有觀者贊之不去口解楠

檀軸懸珠龕半付西方社中友我亦花之  
寺裏僧執管描摹竟未能願乞無量智慧  
燈開我道眼增雙明

秋池

板橋紅冷夕陽明荷芰香銷水淺清粘岸  
枯萍深一尺寒龜曳尾曝秋晴

病目酬朱菜園見過

目生熱疾坐緇帷雪白梨花開未知寂寂  
烟廊門未掩題詩人去已多時

病目呈程南陂夫子

昇仙空自羨方瞳何以看花似霧中恐作  
盲人張太祝半生心事坐詩窮

病鶴

病依人立影生寒迥自寒空憶羽翰昨有  
山僧寄書至開函先問爾平安

江上放舟

紅板橋頭青酒旗看山最好夕陽時瓜皮  
艇子輕如許搖出蘆花槳一枝

婦翁新鑿一泉名曰比性

鑿泉不鑿性性比泉源潔修綆汲寒花冷  
冷作金屑

偶作

賣畫錢爲買酒錢去年歡笑復今年偶然  
醉卧北山頂便有人傳說是仙

江上懷人絕句十五首

書法曾傳日本國詩篇不入承明廬七十  
已過開老眼只看草木及蟲魚

金冬心夫

一官輕棄返初心游戲人間歲月深曾到  
蓬萊看東海題詩笑付老龍吟鄭板橋  
杜門稱疾不出關懶與屠沽通往還一自  
驂鸞仙去後生綃誰畫南徐山高犀堂  
八百金丹道已成巽風離火掌中生君家  
雞犬非常物不作人間乞食聲楊吉人  
銷魂一卷鮑家詩翠袖天寒泣竹枝定有  
秋墳鬼爭唱三更正是雨來時董竹枝  
少府螭文鳳擅長更從石鼓辨岐陽羨君



左筆書奇字絕似風流鄭括蒼

湯太羹

奉母藜羹春日遲白頭尙爾卧茅茨要知造物關經濟請讀人間水駁詩

閔廉風

道人苦行安四禪稜迦一卷相周旋古井無波汲修綆洗心便是菩薩泉

古水上人

魚鹽市上俗喧騰常手一編君獨能都少卿家風雨夜三更尙有讀書燈

朱二亭

思之不見沈東陽却爲鱸魚返故鄉想着先生草堂上陸機山色落書牀

沈學子

一門有集頌時賢雙管題詩年復年我愛

岑家好兄弟竹間聽雨對床眠

陳授衣江臯昆仲

畫竹曾傳鳳尾梢幽人只合處衡茅自題

自寫稱三絕石室先生一解嘲方竹樓

栩栩蘧蘧入夢頻羅浮蝶大如車輪足跛

儼似吾邱衍調鉛殺粉能寫真

汪北亭

衡門不改舊青瑣終日書聲誦古賢六十

年逢堯甲子直須爛醉百花前

盛引堂

愛客鑾江有盛名荷亭六月暑風清五君

四士時來訪讓爾當筵詩早成  
汪礪礪

九日集永慶寺

僧亦愛重九招我題糕處  
伊蒲設齋厨茱萸入酒庫  
衆山青到門一塔遠出樹  
破帽冷戀人不被風吹去

城東酒肆題壁

誇酒書旗列瓦礪荒荒孤店  
古城隈風吹一夜雪平掌人  
挈空餅渡水來游石佛山  
遇慈水鄭雪蕉

尋山未尋君君忽山中遇携手入野寺流  
連佛前語時聞沁雪泉湔玉聲如雨

午睡

水花簾影漾文漪詩眼慵開午倦時架上  
殘書抽作枕風中清簟展臨池不知石鼎  
茶香久翻喜苔茵客到遲心地最難除熱  
惱睡鄉畢竟少愁眉

西湖雜詩二十二首

乍到西湖雙眼明春陰漠漠曉烟生携筇

不定游踪跡但揀雨絲疎處行

梨花開後草離離幾處荒涼卧斷碑誰復  
來尋蘇小墓西泠橋下立多時

淡雲微雨水仙祠新綠成陰四月時怪底  
湖名號西子春山細細畫修眉

真居香篆路能通草履絺衣訪葛翁歷歷  
寶雲山上樹初陽臺畔夕陽紅

白沙泉掬一瓢清吹到樵風帶磬聲更向  
棲霞嶺上去紫雲洞裏看雲生

金沙港口水平沙三竺游來日已斜  
烏榜紅舷爭送客櫓柔搖碎一湖霞

半焦魚帶朱鱗損斷尾螺披綠髮長  
眼見顛師留手澤井中運木未荒唐

紅漾粼粼酒滿瓢湖船載月聽吹簫  
白蘋花上三更雨幾點漁燈出斷橋

亭俯春淙閣借秋烟筇月屢記淹留  
澗泉髣髴幽脩語一鶴隨人也掉頭

暖翠浮嵐霽景閑青萍風起紫菱灣  
忽看

水霧濃含雨失却西南一帶山

兩峯突兀插天青一鷺橫飛下遠汀雨過  
蘇隄忘日暮鐘聲又聽出南屏

茅家埠外水烟昏已見林端露月痕聽得  
榜人爭喚渡清波門與湧金門

平泉金谷等滄桑過眼豪華跡渺茫葛嶺  
草深人不到秋風秋雨半閑堂

鯉魚風急雁來天黃葉秋山思黯然忠憤  
何關小兒女也知羅拜岳墳前

漁舟泊處似江鄉  
閑掛笊簪愛晚涼  
烟水

磯頭疎雨歇  
蟬鳴衰柳送殘陽  
葉公祠乃張太宰烟

水磯見錢心卓筆記  
曲院荷風皆其地也

倦鞞弓鞋寶髻鬆  
藕花衫子細初縫  
第三

橋畔臨波立  
儂看芙蓉人看儂

南山亭子倚山隈  
更有何人掃壁苔  
千載

顛狂米漫士淋漓  
大筆寫琴臺

松陰路轉竹門扃  
曾訪龍華寺裏僧  
秋草

可憐荒殿合更無人問藕絲鐙  
藕絲鐙梁武帝時物



也所織紋實華嚴會說法相有天人鬼神龍象宮殿之屬政和後索入九禁

策蹇尋詩縱曰殊一旗摇曳酒先沽憑誰喚起王摩詰畫出西湖雪霽圖

放鶴亭前漠漠苔風吹笑語出墻來不辭露濺宮鞋濕偷折孤山處士梅

巖花澗草曾相識白鶴元猿亦解迎若踵佳游期異日苔痕應蝕我題名

他年結隱著叢書巾子峰前好卜居抗跡敢云作湖長此身只合老樵漁

遣僕

敗葉風前不戀枝  
山童欲遣意遲遲  
夜深記讀秋聲賦  
念爾垂頭伴我時  
圖書事事待收儲  
名字多應去後呼  
世上豈無蕭穎士  
誰知爾是愛才奴

仿宋人雙鉤竹

畫竹有聲風滿堂  
法從鉤勒異尋常  
鸚哥毛細休輕染  
此是仙都白鳳皇

病中

鄉夢纔成恨又醒孤蛩聲急人踈櫺西風  
欺我蚊幃薄秋雨年年病裏聽

初至淮陰寄簡姚英三袁浦

安穩黃河棹風晴到楚州夕陽餘竹巷歸  
窴託僧樓犬吠偏欺客蛩吟似感秋因之  
念姚合久滯正添愁

韓侯釣臺卽目

艇子衝波去復來荒蘆一桁古城隈寂無  
泚泚人見獨上韓侯舊釣臺

破壁頽櫺照晚晴  
碧花紅穗俯潭清  
秋風幾日欺人老  
無賴蜻蜓翅有聲

九日過二亭

暫息天涯現在身  
秋風吹雨浣衣塵  
三年不見籬東菊  
九日來尋巷北人  
退隱陶潛誰送酒  
謂杜公未歸張翰  
尙思萼謂沈丈樽前自笑還如客  
明發扁舟又問津

秋夜集黃瘦石齋中說鬼

秋室昏孤燈  
書棚墮饑鼠  
狂鬼若無人  
擲

揄來三五我豈具慧眼惡趣偏能覩頸或  
曲且高身或短而僂齒露黏中犀指或大  
如股風捲一院陰倏忽遠堂廡悄然尋潛  
踪落葉聲如雨反覺恐怖生肉上寒毛豎  
因之歎阮瞻終爲鬼所侮妄聽且憑君我  
語非妄語

自歎

飄零自歎髩成絲此夕心情減昔時楚女  
春衫曾拭酒洛妃羅襪舊題詩黃花籬外

身同瘦紅燭風前淚共垂多謝當鑪人問  
訊姓名只合酒家知

項貢夫畫梅歌

冬心先生今已矣落梅滿地酸香死君與  
我是歲寒交曾共花前稱弟子先生畫梅  
本花光期我與君爲王楊僧樓日日試縑  
素驅使筆墨心手狂笑我墨汁傾一斗長  
枝大幹蛟龍走人瘦花疎合讓君相向春  
風我較醜昨寫天寒欲雪圖疎香如有影

如無鐵線穿花勻个个排蕾攢萼何曾麤  
茶熟香溫自張挂看久是花不是畫那得  
風流易米僧可憐也向街頭賣

著老書堂觀吳仲圭墨竹卷

梅花道人性孤潔時有清風手中出畫竹  
直師文洋州葉葉着枝枝著節晴牕展卷  
喜初看三百年來墨未乾一筆一筆有生  
意蕭蕭若箇弄清寒十尺鵝溪間三五半  
是風晴半烟雨淋漓破筆掃秋空縱橫之

中悉規矩首書畫論超宋唐翛然卓立聳  
節篁問誰更有凌雲筆偷將炎歐一片涼  
新梢枯籜各爭肖直爲後學指其要可憐  
癡絕道人心當年徒被山妻笑

三詔洞前取逕往雲深菴

風捲潮痕失釣磯片帆西去逐雲飛何人  
背倚篷窗立看我扶筇上翠微

竹石贈答四首

凌風愛虛心干霄信直節得依君子居庶



免煎茶厄

竹自詠

漫憐頑鈍材天地一大塊世無海嶽翁不  
受他人拜石自詠

猗猗徒自好棲鳳企梧檟抱負誠慚君出  
雲雨天下竹贈石

仰攀凌雲枝貴等萬戶侯清風勤拂拭盟  
好礪山止石答竹

雨中集小書畫舫觀巢林西唐遺墨  
風流不可見妙墨尚人間留客方開卷呼

童先掩關雨中思白髮燈下看青山況值  
梅花放淹留未肯還

雨中過虎邱

趵然屐齒破蒼苔重訪生公舊講臺暮雨  
蕭蕭春寂寂千人石上一人來

集市隱園

市隱園幽隱市西詩人初至鳥初啼微雲  
疎雨宜新綠水閣長廊續舊題看畫却無  
寒具設品茶不待竹爐携眼塵乾淨心離

垢何處曾容落燕泥

晨起出郭至淨香園

侵曉乘涼曲檻前  
絲絲楊柳尚拖烟  
畫船依舊虹橋出  
只有荷花減去年

儀研田折夏蕙一枝見贈是日爲內  
子生日

駢穗柔荑植一叢  
女蘭開不借春風折來  
猶帶金莖露香滿  
蘆簾紙閣中

七夕沈學子招集學福軒

漠漠江雲弄畫陰滿庭雨氣隔簾侵尊前  
歧路人南北江玉屏欲往淮陳屋角雙星  
夜淺深勝事故應添客興離悰多半話鄉  
音漳濱病起仍豪健搖筆縱橫發浩吟

管家池上作

秋柳梳風葉未疎溟濛烟水入空虛  
岼邊白鳥驚飛起一字輕舟去打魚  
微風生處蹙波輕各設罾罟趁月明夜半  
喧晴蘆葉雨荒灣幾曲有人聲

中秋集叢綠山房四首

亂葉聲中步履遲  
肯同宋玉爲秋悲  
一年最好唯今夜  
獨我偏逢作客時  
高館琴罇聯舊雨  
西風雲鴈入新詩  
酒痕墨漬盈襟袖  
不管清霜點髭絲

十載狂名此地聞  
海天重喜入鷗羣  
笛吹子野成三弄  
月信揚州占二分  
望遠不嫌衣上露  
圖成休道硯生雲  
時爲滄厓作騷  
中秋文讌圖  
壇自昔競旗鼓  
敢爲諸公張一軍

歲華容易去，駿駿寥落空。傷老，大心傲客。  
詩才惟此夜，亂人愁緒。是秋陰，紅燈閃閃。  
彈還暗綠。酒粼粼，勸復斟萬一。嫦娥因我，  
出掃除雲翳，盪塵襟。

欲寄相思託好風，離情無那此宵中。捲簾  
坐月，高樓上，遲鶴傳書。大海東，入市魚蝦，  
經眼異供盤。芋栗故園同尊前，且漫成惆  
悵。一笑身輕，類轉蓬。

過滄洲，購得五年陳釀二餅。

何物方能解客愁  
酒旗飄處泊歸舟  
當壚許我嘗風味  
不似平原有督郵  
春甕儲藏歷幾秋  
旋開泥印綠于油  
歸時贏得誇人處  
一醉何須向婦謀

同鐵簫放舟至惠照寺鐵簫以黃葉  
詩見示因贈

幽禽梳濕羽  
樹杪上微曦  
野水添新漲  
空山證舊詩  
鐘因風度遠  
僧恠客來遲  
眼底  
黃葉何人不爾知

過石庄上人精舍和二亭韻

消除熱惱是僧家竹閣風生鳥喚茶世事  
不關塵不到我來樹義說蓮華

相逢值有渡江僧叅得禪關最上乘謂玉掌

若問孤踪雲海遍十年吟瘦一枝簾

草履絺衣絕俗塵三年許我話前因他年

僧史添公案識得揚州一市人二亭自號揚州市人

曾游兩越與三吳謂石庄望裏江山入畫圖

恠底老來雙眼碧清泉自汲養菖蒲



泊舟平山堂下

波弄去年綠梅開萬古春連朝倦車馬細  
雨淨埃塵畫舫橫花嶼湘簾隔麗人平山  
堂下路一步一逡巡

牀頭古甕插春梅一株日高三丈猶  
偃仰于橫斜疎影間也

翠幄低垂夜漏分博山何用水沉熏梅花  
在我牀前笑自說仙人卧白雲

過桃花菴

不通城郭不通邨一路桃花開到門溪上  
竹堂無箇事袈裟時有墨汚痕

集唐句贈龔杏莊用韓愈齋韻

洛陽花雪夢隨君

謂從尊公河南任上來

紅燭芳筵

惜夜分忽發狂言驚滿座饒君壯歲氣如

雲

李商隱杜牧

武元衡白居易

不似身來似夢來仙聲颺出鳳皇臺相逢  
何必曾相識拖紫銜金濟世才

許渾說

白居易劉商

夜來空見玉繩低豪馬爭奔丞相隄冷眼

靜看真好笑請君相伴醉如泥  
曹彦謙  
林寬

徐賓  
吳仁璧

飛揚跋扈為誰雄十載長安似夢中夜半

酒醒人不覺文章何處哭秋風  
李涉

竇瑗  
李賀

熏爐集唐句

博山香重欲成雲玳瑁筵前整頓頻  
斲簾

蜀琴相對好水沉山麝每回新莫嫌無事

閑消日贏得馨香暗上身應裊綠窗殘夢

斷後堂羅帳一相親

溫庭筠

劉章

李

鵠

李建勳

### 水仙

纔開臘屐不勝情影落空江韻更清脈脈  
數莖春意透娟娟一朵曉寒生絕無烟火  
依泉石合有梅花作弟兄他日捲簾勞夢  
想爨齋渲染恐難成

辛卯十二月十九日王萃圃招同人

作坡仙生日

眉山面目作生綃

予寫坡仙小像

孤鶴南飛蹟已

遙竹颺花猪誰作供酒須真一酌三蕉

半簾寒色一爐香高館詞人樂未央記得

坡仙生日事寄茶會亦有王郎

英夢堂相國招飲海棠花下

留歡花榭醉華筵爛漫春光滿眼前燒燭  
不妨看半夜裁詩準擬住三年胭脂露壓  
枝枝重蓓蕾風含朶朶妍殺粉調脂看妙

筆白頭真作海棠顛

是日錢宮詹韓石先生作海棠長幅

爲覺羅成雪田寫醉中陟險圖并題

此詩

醉中陟險雲爲地脚底瑤笙風入松誰道  
先生瞳白眼時時青到兩高峯

借山樓曉望

好山頻入夢下榻且登樓何處尋三島還  
疑坐一舟蒼茫不可卽烟靄已全收歷歷  
晴巒見看人盡白頭

得家書

家書未到費疑猜  
接到家書手怕開  
昨夜細看今又展  
此心聊抵故鄉回

宿吳劍南寓館爲周筠邨畫梅

疎林寒月出  
瞰我寫梅花  
爛醉金荷葉  
狂吟玉畫叉  
古歡嫌燭短  
夜析逐街斜  
別後如何處  
相思天一涯

癸巳冬予客津門  
畫江路野梅圖携  
至都下吳劍南見  
賞贈予一律有

商略圖中江路去野梅畢竟勝官  
梅之句因仿南宋馬侍郎筆法畫  
官梅圖并系以詩

江南江北路漫漫薄暮天寒欲寫難何遜  
春風好詞筆梅花還要宰官看

江路野梅圖書冬心先生詩云驛路  
梅花影倒垂離情別緒繫相思故  
人近日全疎我折一枝兒贈與誰  
周二筠邨愛不忍置欲得之次日



爲翁學士携去未幾筠邨從吳劍  
南有西蜀之役因畫此幀贈行并  
賦二首

水脉巴江到竹西梅花開候悔歸遲不期  
送爾巴江去一路梅花壓帽低

此別何堪誦此詩兩人真箇費相思莫忘  
東閣觀梅候驛使來須寄一枝

癸巳閏春出齊化門至潞河登舟口

占

長安策蹇署頭銜劉虛白鑄長安策自笑

緇塵染客衫隔歲歸期今始決秋帆不挂

挂春帆去秋余畫歸帆圖以詩贈行者六十五人

過西沽懷儀研田項貢夫

春波帖帖接平蕪何處烟墟叫鶉鵲惆悵

舊遊人不見一篷絲雨過西沽

登泰山至南天門

我欲游八極危梯欣可借逍遙倚天門仍  
在天之下不見玉女迎但覺塵氛謝罡風

足下生倒聽松濤瀉雲中毛骨涼曠然忘  
炎夏口誦白也詩安得斑龍跨

寄別紀半漁

自比山雲笑未閑無心飛出又飛還淹留  
畢竟緣何事不是尋君卽看山  
莫管人間有別離君真能識我真痴定知  
後夜呼燈起忽憶狂夫說鬼時

夜泊珠梅牖同二亭作

已次珠梅牖行踪喜暫停秋懷兩人得夜

雨一船聽听近犬聲沸雲低水氣腥西風  
曾幾日吹上萬松亭

獨泛至竹堂上人精舍訪吳中汪介  
亭不值

疎柳石橋外蜻蛉牕影紅迎人萍葉雨吹  
面鯉魚風誰識尋僧去還憐訪戴同相期  
不相見惆悵文陽中

舟中卽目

甓社湖荒雨靈露筋祠冷雲留堦上炊烟

乍起晚風吹過船頭

蔡鹿文將之東海索弔畫送行圖戲

贈

楊柳孤帆日暮杏花細雨春寒年來最怕  
送客君翻愛作圖看

江硯農招集晴綺軒分韻

三年未醉江髯酒晴綺軒開竟日留笑我  
才歸盧水棹恠君又買漸江舟眼中花事  
成紅雨座上詩人半白頭自是月明春夜

永飛觴不惜罄新菊

送焦五斗之楚

送君之楚黯傷神千里長江浪似銀依舊  
楚山青到眼誰憐君是白頭人

寄許衡州用板橋贈衡州韻

江淮韻士許衡州聞道衰年厭出游鈎勒

畫成憑我贈廓填書好向君求曾索予畫

廓填鄭茶鳴夔底三春雨香焚蘆中一葉

舟白髮風流思不見可能扶杖再來不

古劍

床頭藏已久風雨夜常鳴  
煅鍊年難考恩讐人屢更  
光搖秋水立血蝕土花生絕  
少胸中事孤斟看到明

秋水

長天同一色淼淼望無涯  
昨夜添三尺柴門浸幾家  
澄波印鴻雁寒影繪蒹葭  
漁笛起何處烟深冷鈎槎

移居集陶四章

先巢故尚在眷眷往昔時如何舍此去不

知竟何之非爲卜其宅卓然見高枝宅中

枯寒風拂枯條此蔭獨不衰立善有遺

愛人道每如茲願言誨諸子指彼決吾疑

茅茨已就治斗酒聚比鄰問子爲誰歟言

笑難爲因總不好紙筆念我意中人撥置

且莫念卽事多所欣

清晨聞叩門有客賞我趣提壺挂寒柯揮

觴道平素感彼柏下人旣來孰不去依依



昔人居今復在何處

游魚思故淵此語真不虛託身已得所計  
日望舊居脫有經過便綿綿歸思紆此行  
誰使然君情定何如

別舊宅二首

舊宅無端我獨離琴書結束借車時一椽  
一死皆先澤當日辛勤却爲誰

雙垂別淚拜堂前兄弟相依四十年  
聽雨竹窗空有夢醒來莫認對床眠

謂三兄

杏花

占斷江南色烟濃護遠邨燕窺寒食雨人  
叩夕陽門宋玉墻頭影文君酒畔痕亭亭  
如喚客吹笛坐黃昏

漁菴夜雨

牕月忽不明風送疎疎雨蓼洲客夢醒卧  
聽歸漁語

乙酉人日鍾雪樵以石帆山人贈有  
人曰生人人可憐之句爲起句壽

余邀同蔣心餘太史同作因亦繼  
成三首非自壽實自憐也

人曰生人人可憐花之寺裏記身前

予初生時

不如輩血常夢入花之寺

因自號前身花之寺僧浮踪浪跡尋來

路流水開花又一年仍此性天仍色界也  
如行脚也逃禪新詩呈佛無他願再結來  
生不昧緣

人曰生人人可憐金牛山下淚潛然

父母先

墓在金牛山下有年馳驅南北三千里夢

矣因自號金牛山人

殊松楸二十年誰識早孤剛及歲自嗟抱  
恨到終天此生空羨承歡客再結來生膝  
下緣

人曰生人人可憐此身暫寄蓼洲邊

近役西江

自號蓼洲漁父牀頭那有雌雄鐵市上空多子母  
錢短髮鏡中鹽比白新愁客裏酒難蠲不  
爲人用何能說再結來生自在緣

朱運司座上食哈密瓜

一時眼底見伊州職貢餘來翠欲浮今夕

堂筵羞下嚙書生齒冷說封侯

題龍生沙彌行看子

年來歎爾太飄零今日相逢眼倍青何事  
情親如眷屬花之寺裏舊單丁

南園卽事

團團樹影綠遮窗酒意詩情兩未降隔岸  
冰禽忽驚起片帆將雨下烟江

臨流小閣記曾登依舊青山感慨增朋輩  
凋零園易主南鄰只有破菴僧

謂雪菴上人

水香邨墅磯頭作

層層波影接鷗灘獨立磯頭夕照殘垂釣  
何人空手去柳陰遺却一漁竿

深谷樵薪歌爲內兄且鄉題照

君旣不學張志和獨坐釣艇衝烟波又何  
不學朱百年代樵采若日易錢胡爲入谷  
躡雲棧負薪只爲供炊爨落木蕭蕭排厥  
巔利斧丁丁響前澗樵風導引深山深胼  
胝無人知此心我是當年鹿門子也將辛

苦付遙岑行經趣路雲遮截簞瓢命定向  
誰說仔肩自任漸難勝白頭應歎筋力絕  
日出翦伐歸黃昏伴侶散走前後邨一抹  
殘陽江隔岸秋林踈處見柴門擔薪時帶  
野花束杖荷歸來歌一曲山妻稚子立候  
門縷縷厨烟出茅屋

將之都門別內子口占

出門落淚豈無情君病空牀我遠征默默  
兩心誰會得明知見面是他生

過羊流店

禿尾疲驢渡水遲山行計日已愆期  
旗書小市偏誇酒客過荒村也賦詩  
自有祠存羊叔子更無人說峴山碑  
十年記得曾經處日暮天寒雪下時

濟南運署夢內子手持自畫梅花卷  
向我云我去滇南矣是日乃六月  
十一夜也作此記之

病妻一月無音耗有夢分明倍客愁  
手把



梅花指歸路飄然昨夜去羅浮

八月三日萬華亭自揚州來京師云  
予內子已于五月十九日去世聞  
信之後悲不能已因作長篇以當  
哭云

乍欣良朋至旋使我心悲道我室中人永  
與君別離因思出門日遲遲復遲遲執手  
話床第泣涕交相垂枕畔見墨痕集句成  
別詩達生寓詩意死以秋爲期

集句云自  
知死亦人

閒事多是秋風搖落時  
會面那可必予已先有詞月  
缺有圓夜花落有開枝爾死無生理我出  
有歸時欲歸予未得縱歸爾不知

十二月十九日爲東坡生日翁覃溪  
學士邀集同人用蘇字韻送予出  
都余亦繼作

尙友心期道不孤先生自是列仙儒  
辦香遠接峨嵋蜀肖像爭傳學士蘇  
此日奎垣爭降宿來朝客路復吹竽  
天寒歲暮匆匆

別高曾還思異日俱

初至保定過蓮池書院與董曲江太  
史話舊卽集其舊雨草堂集中句  
成詩十二首

携筇竟向講堂行鄴架居然擁百城一自

冶春文讌後閑雲野鶴識先生憶初識荆在雅雨夫

于座

門酒風高翰墨場平山客散選樓荒驚心  
漫話邗江別回首三生賸渺茫

勞勞蝸角誤浮生又踏春明軟土行予年

至京莫訝青山留別淚盧溝水合靜無聲

聚如萍葉散如蓬回首長安極目中予在京師

與翁覃溪諸公時相唱和未免有情忘不得催人節序

太匆匆

王粲頻年也倦遊故園何處問南樓諸公

漫話歸田樂痛憶人琴淚不收謂梁明府

升沉生死尋常事落拓吟魂或可招咫尺

雲亭迷舊夢今來才盡首空搔

無緣笛裂感山陽底事干卿總斷腸自笑  
苦吟耽結習依然同日詠霓裳先生與予  
同有悼亡

戚之

尊鱸歸計竟無期錦瑟年華事可知血縷  
尚牽思婦恨重來花下但空枝

霜毛論丈欲三千顆顆明珠泣粉蓮子內

號白蓮  
女史

獨有衰眸兩行淚浮生草草夢中

緣

空梁月落夢誰知倦鳥隨緣寄一枝殘臍

頓教忘客况欣依大雅得吾師

聊憑舊雨

名諱堂

慰新愁載酒頻來作勝遊

饒有烟霞隨杖履不勞仙枕夢封侯

漫從車笠較升沉但入鑪錘總是金寄語  
老人應識我生涯悟徹去來今

爲萬梅皋刺史寫頂禮大士圖

時刺史尚

在獄中

且禮空王作靜緣繩床土屋儼枯禪故園  
夢斷三千里苦海魂驚十二年深夜月明

翻貝葉落花風過裊茶烟皈依畢竟除煩

惱一顆明珠繞膝前

刺史樊大士賜一珠因得子名牟尼

曲江出示蘇文二妙墨卷後有元柯

九思明王彥貞墨竹暨錢閣學穉

石先生舊作屬予畫續之因和王

詩韻

蘇文仙去柯王遠穉石先生筆亦奇舊竹未枯新竹出箇中又見一花之

已亥除夕爲立春日用簣谷周明府

見贈詩韻兼簡簑谷

臘欲先年盡春從此日來客中書卷我畫

裏水仙梅迢遞家千里飄零酒一盃山妻

詩尚在回憶不勝哀

去年除夕內子詩云  
推敲僕解吟除夜道

染兒工畫歲朝樂事人間  
如此少勸君滿飲酒干瓢

俗事客居少風前燭未灰且教詩夢醒還

待故人來去住憑君決行藏久自裁聞雞

應起舞更漏好相催

易州署中曉起有作



夢醒披衣獨自行綠槐影裏曉風清自憐  
不及啾啾鳥占盡高枝過一生

枕上見月偶得一律

夜月照窗紙家鄉入夢遲客愁何處說鄰  
笛不時吹空有千秋業曾無十日資欲歸  
歸未得何以慰兒癡

十月二日余月邨招同王秋塋徐尚  
之張萼樓集法源寺僧舍

無佛無僧處天涯草草逢相看俱瑁璫何

事不從容樹影如人瘦秋光讓酒濃莫忘  
今夕語同聽一聲鐘

秋日同陳古漁吳先之詣鷺峰寺因  
至舊院廢址

秋水離離太寂寥夕陽影裏話前朝可憐  
踏遍青谿路不見當年舊板橋

集王摩詰與裴秀才書中字題先之  
所畫輞川圖

山林煩妙手之子趣機清靜夜感寒氣踈

鐘流遠聲水中春月白岡上露華明朝出  
邀僧去登臨獨步輕

過瓦官寺感作

當年陶所問斜矐六代人文化暮雲壁畫  
維摩錢百萬眼中誰是顧將軍

高座寺

東晉留名刹秋晴共客尋杪櫺當戶老吉  
利護堦深聽法人何在披緇事未沉雨花  
同一戲秋草散高岑

汪阿濤招同古漁游城南天界普德

諸寺

如此清秋肯負閑故人招我出塵闌叢叢  
霜樹寺連寺疊疊晴空山接山老衲重期  
詩客過寒鴉已帶夕陽還雨花臺上騁遊  
目無數江帆縹緲間

圓桌三首

月地花天待飲徒匠心別運好規模先天  
有象擎孤柱首座誰尊失四隅侍席僕忙

蟻附磨當筵酒暖客圍爐醉餘若肯還耽  
坐紅袖烏絲不可無

九老能容異八仙相逢畢竟酌誰先客無  
次第星常聚天有循環月暫圓歌稱管絃  
聲宛轉杯飛鸚鵡影迴旋如今事事通融  
好只恐方輪路不前

從此團欒樂未央曾聞百寶製同昌

杜陽編曰

同昌宮十琢百寶爲圓几兕觥玉尊羅前席翠繞珠圍

到後堂拇戰盤旋燈影亂花催輪轉鼓聲

忙夜深客去仍移置閑傍松陰曲曲廊

暖炕三首

匡牀爲式腹空虛厝火窮冬樂歲餘伏枕  
便教圍夢蝶擁衾那復類鰥魚只宜北地  
藏朱戶不合南人卧草廬就日堂前徒曝  
背可能四體一時舒

閨閣兒女坐團樂馬糞頻添火自攢瘦骨  
凍來僵似鐵雄心熏透熱干官茅簷夜夜  
春先到土剎家家夢總安却笑江南窮措

可學  
大梅花紙幃太清寒

誰道流年睡作魔坑灰未冷夜如何覺來  
自笑冬烘客曉起仍歸春夢婆溫室不難  
言語慎陽臺翻恠雨雲多汗微通體  
沐元氣從茲養太和

過隱仙庵戲贈王樸山道士

叩戶尋君與不孤庭前雙桂擬仙姝花無  
隱處人來往識得蓬頭鐵腳無

冬夜招集王青山陳古漁吳先之李

瘦人燕山南項莘甫汪阿濤飲三  
官堂道院以八人四百五十歲爲  
起句分賦

八人四百五十歲休論三萬六千場人生  
行樂心都壯我輩相逢髯已蒼賣藥知名  
寧遠遜吹簫乞食也清狂可憐多少英雄  
淚盡付愁腸化醉鄉

宿京口江深草閣漫賦二絕

絕無人語夜潮生江閣愁多夢不成叫過



孤鴻搖過櫺。一時聽去。欠分明。  
曉烟初泮。夢初回。寂寂房門。手未開。推枕。  
披衣。剛坐起。一船搖入。破窗來。

再來室坐雨

再來傳密祖。今作贊公房。寂寂千人石。迢迢一瓣香。雨聲隨客屐。山影落禪牀。寒食來朝是。茶烟出畫廊。

題清聽軒芭蕉葉上戲贈衡夫

綠陰滿。逕下堦。遲幾樹離離。大葉垂。午睡。

不知來驟雨問誰洗却舊題詩

甲戌二月十八日陳丈授衣蔣丈秋  
涇閔丈廉風樓丈于湘易松滋張  
漁川同過張丈嘯齋着老書堂效  
吳體各成一詩共書長卷荻鄉儲  
藏有年忽出見示索予詩畫裝潢  
成軸以誌不忘并附此詩於上

欲畫雞壇跡已塵風前把卷意酸辛堂開  
一老着何處梅放數枝空復春世上有情

唯聚首行間無語不傷神要知後視今來  
客卽是今人視昔人

黃嚴氏節孝詩

嚴家有女名月英秉質直與冰壺清月光  
墜地化爲玉其母夢之是夕生十六嫁得  
好夫壻黃其姓也錦章字舅姑早逝夫又  
亡夜夜空房面洗淚手抱遺孤依老親爰  
爰相守將終身窗前閑咏無人見不戒于  
火驚比鄰憇卷父與夫著述其他不顧冒

火出出謂人曰休笑癡此是心血真難得  
此心有如明月光此節有如百鍊剛可知  
廿載茹荼苦藍襖不恥嫁時裳

哀四君詠集陶八首

丙午

### 謝小山

良才不隱世如何淹在茲

君家陽美久寓揚州文選樓下

虛室絕塵想問君亦何爲

精造奇器立善有遺

愛暫爲人所羈

時出新意造小水碓

遙遙望白雲旋

駕悵遲遲臨化消其寶魂氣散何之宿草



旅庭前終身與世辭

張石民

人生無根蒂終古謂云然求我盛年歡鍾  
尋信爲賢蕤賓五月中驟騎感悲泉負疴  
頽簷下亭亭月將圓君沒于五月十三日翳然乘化  
去暮歸三危田

銜哀過舊宅舉目情淒沍與予相遇來言  
笑無厭時奇文共欣賞有酒斟酌之今朝  
眞止矣奄去靡歸期

秉氣寡所諧屢空常晏如過足非所欽少  
許便有餘冰炭滿懷抱終當歸空無游魂  
在何方夏木獨森疎

貧帆山

戶庭無塵雜清貧畧難儔談諧無俗調弊  
服仍不周千載非所知明日非所求形跡  
憑化往悠悠迷所留

人生似幻化倏如流電驚始室喪其偏悲  
疾應心零風來入房戶辰雞不肯鳴願言

同此歸恩愛若同生死歿無復餘吁嗟身  
後名但餘平生物緬然起深情君臨危時  
檢所嗜玩

物分贈  
故人

### 管平原

世短意恒多人生少至百念來存故人清  
飈矯雲翮束髮抱孤介樂與數晨夕孰意  
爾先傾枯形寄空木紫芝誰復採寂寂無  
行跡君家有些  
芝山房

藥石有時閑賦詩頗能工弱毫多所宣旣

沒傳何窮流塵集虛座蕭索庭宇中念之  
動中懷人理固有終

初董瓜洲育嬰堂事集陶句以自勗  
兼勗許巢暘

命室携童弱飄如陌上塵立善有遺愛聞  
多素心人堂爲業蘆士商所建今日從茲役爲事誠  
殷勤衣食固其端彭殤非等倫託身已得  
所何必骨肉親

居止次城邑恩愛若同生生而相依附孰



是都不營饑者歎初飽人人惜其情常恐  
負所懷庶以善自名

遺贈豈虛來行行循歸路各自還其家誰  
當爲汝譽寒暑日相催念之使人懼悠悠  
待秋稼所營非近務壑舟無須臾豈不以  
我故

與子相遇來從今至歲寒傾身謀一飽行  
止千萬端衛生每苦拙弗獲辭此難念之  
中心焦而以求自安明明上天鑒渺然不

可干

四嬰詩集陶

弱女雖非男邈與世相絕益復知爲親在  
目皓已潔不見相知人未嘗異悲悅盲嬰  
弱子戲我側顧盼莫誰知叩門拙言辭我  
今始知之厭聞世上語爲君作此詩啞嬰  
弱質與運頽負疴不獲俱氣力漸衰損此  
人將焉如藥石有時閑慰情良勝無病嬰  
欲留不得住拙生失其方有生必有死相

與還北邙爲山不及成憶此斷人腸故嬰

歲暮雪中瓜洲城上矚目

雪密遠山沒江空一檣鳴雁隨雲脚度帆  
向樹頭行閃灼金山寺迷離鐵甕城何期  
當歲暮尚復有閑情

和二亭履淨堂韻

跋陀羅尊者相傳譯經語方便淨業人華  
嚴義始露皈依履茲土所以名堂故青龍  
恣貪嗜早爲衆生護尊者遭擯時不比折

輩渡總之清淨心履淨得真悟至今空餘  
臺亦似祇園樹我今登斯堂究心無所住